

**ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ
ҚАРОРИ**

**ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИ
ҲУЗУРИДАГИ ҚАТАҒОН ҚУРБОНЛАРИ ХОТИРАСИ ДАВЛАТ
МУЗЕЙИ ВА ҲУДУДЛАРДАГИ ОЛИЙ ТАЪЛИМ МУАССАСАЛАРИ
ТУЗИЛМАСИДАГИ ҚАТАҒОН ҚУРБОНЛАРИ ХОТИРАСИ
МУЗЕЙЛАРИ ҲАМДА «ШАҲИДЛАР ХОТИРАСИ» ЖАМОАТ
ФОНДИНИ ҚЎЛЛАБ-ҚУВВАТЛАШ ТЎҒРИСИДА**

Ўзбекистон Республикаси Президентининг «Қатағон қурбонларининг меросини янада чуқур ўрганиш ва уларнинг хотирасини абадийлаштиришга доир қўшимча чора-тадбирлар тўғрисида» 2020 йил 8 октябрдаги Ф-5598-сон фармойиши ижросини таъминлаш мақсадида Вазирлар Маҳкамаси қарор қилади:

1. Ўзбекистон Республикаси Олий ва ўрта махсус таълим вазирлиги Вазирлар Маҳкамаси ҳузуридаги Қатағон қурбонлари хотираси давлат музейи, Қорақалпоғистон Республикаси Вазирлар Кенгаши ва вилоятлар ҳокимликлари билан биргаликда бир ой муддатда олий таълим муассасалари тузилмаларидаги Қатағон қурбонлари хотираси музейлари (кейинги ўринларда — ҳудудий музейлар) фаолиятини такомиллаштириш бўйича чора-тадбирлар режасини ишлаб чиқсин ва тасдиқласин. Бунда:

соҳа мутахассисларидан иборат ишчи гуруҳ тузган ҳолда, ҳудудий музейлар фаолияти ҳамда моддий-техник базаси танқидий ва таҳлилий ўрганилиши;

зарур ҳолларда, ҳудудий музейларнинг етарли шароит мавжуд бўлган биноларга жойлаштирилиши, уларга экспозиция заллари, музей фонди ва ходимлар фаолияти учун хоналар, мебель жиҳозлари, замонавий техник асбоб-ускуналар, шунингдек, белгиланган тартибда техник ва хизмат кўрсатувчи (фаррош, электрик ва бошқа) ходимлар ажратилиши;

ҳудудий музей раҳбарларининг сўровлари асосида уларнинг хизмат сафарларига (ҳудуддаги туман ва шаҳарларга) боришлари учун олий таълим муассасасидаги мавжуд навбатчи енгил автотранспорт воситаларидан (ёқилғи билан таъминлаган ҳолда) фойдаланишлари назарда тутилсин.

2. «Шаҳидлар хотираси» жамоат фонди ҳисобварағи барча жисмоний ва юридик шахслар, халқаро ва хорижий ташкилотлар томонидан ҳомийлик хайрияларини ихтиёрий тарзда тушириш учун очик эканлиги маълумот учун қабул қилинсин.

3. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари:

2021 йилнинг 15 июнига қадар Қорақалпоғистон Республикаси, вилоятлар ва Тошкент шаҳри бўйича тайёрланган кўп жилдлик «Қатағон қурбонлари» хотира китобларини нашр этиш учун Вазирлар Маҳкамаси ҳузуридаги Қатағон қурбонлари хотираси давлат музейи талабномасига кўра зарур маблағларни «Шаҳидлар хотираси» хайрия фондига ажратсин;

2021 йилнинг 1 июлига қадар «Шаҳидлар хотираси» хайрия фондининг бўлимлари фаолиятини ривожлантириш ва молиялаштириш манбаларини диверсификация қилиш бўйича зарур чора-тадбирларни амалга оширсин.

4. Ўзбекистон Республикаси «Ўзархив» агентлиги давлат архивларида сақланаётган қатағон сиёсати акс эттирилган архив ҳужжатларининг электрон нусхалари доимий равишда ҳудудий музейларга бепул тақдим этилишини таъминласин.

5. Вазирлар Маҳкамасининг «Ўзбекистон Республикаси Вазирлар Маҳкамаси ҳузуридаги Қатағон қурбонлари хотираси давлат музейи ва ҳудудлардаги олий таълим муассасалари тузилмасида Қатағон қурбонлари хотираси музейларини ташкил этиш чора-тадбирлари тўғрисида» 2017 йил 22 ноябрдаги 936-сон қарорига иловага мувофиқ ўзгартиришлар ва қўшимча киритилсин.

6. Ушбу қарорнинг бажарилишини назорат қилиш Ўзбекистон Республикаси Бош вазирининг ўринбосари — туризм ва спорт вазири А.А. Абдуҳақимов ҳамда Ўзбекистон Республикаси олий ва ўрта махсус таълим вазири А.Х. Тошқулов зиммасига юклансин.